

# BERTSO BERRIAK

Xenpelar  
Dokumentazio  
Zentroa

## TXAKURKUME BATI.

Albizu'k jarriyak.

1.º Txakur bat galdu zaigu  
izena du "Lagun",  
beran billaka nabil  
gau eta egun,  
aztarrenikan ezin  
atera det iñun,  
ez dakit ura gabe  
zer egin biagun.

2.º Bildurturikan egin  
lezaken katiatz,  
lotuta edukitzen  
genduen katiatz,  
al zanik ondoena  
sabela betiaz,  
ez geunden aspertuak  
jaten ematiatz.

3.º Begiratzen genion  
esan detan gisan,  
etxia zaindutzeko  
aproposa bai zan,  
errespeto onekua  
berez etorri zan,  
beste lanik etzuen  
jan, eran ta etzan.

4.º Zein etzun ikaratzen  
zan txakur aliak  
ta askatzian egiten  
zitun zaldaliak,  
zaunkaz uxatzen zitun  
toriatzalliak,  
garbi esango ditut  
dauzkan siñaliak.

5.º Mutur zabal nabarra,  
beso anak gorrik,  
isatsa kendua ta  
moztuak belarrik,  
narruzko jantzi beltza,  
bi begiyak argik,  
letagiñak okerrak  
ditu ezaungarrik.

6.º Ama presakua du,  
aita alemana,  
ijituari tratu  
txar asko emana,  
burrukari guztien  
nagusi dagona,  
biartzian badaki  
agertzen kemena.

7.º Oietatik sortu zan  
gure "Lagun" beltza,  
iñork ez dakiela  
egin digu martxa,  
orrela pamilirik  
ezin leike altxa,  
obe nuan gizendu  
banuen bildotxa.

8.º Jayo zala zituen  
laun bat illabete,  
boštik etzitan beintzat  
oraindikan bete,  
gurekin aspertua  
zegon nolabaite,  
argatik alde egingo  
zuan norabaite.

9. Etzeguan argala  
ezta ere astuna,  
ni gabe billatu du  
bere erostuna,  
norbaitek erantsiko  
ziyon eraztuna,  
daukanak badaki ura  
beria eztuna.

10.º Zortzi egun baditu  
etxetik galduta,  
unuzkero jarri da  
gosiak aulduta,  
beretzat jaso dunak  
zarpatik elduta  
meserez ekartzala  
jabia baduta.

11.º Bateonbatek badu  
nunbait ikusiya  
edo besten bateri  
zerbait ikusiya,  
ekartzen didanari  
arren notiziya,  
berari emango diyot  
sari bereziya.

12.º Orduantxen egingo  
gerade lagunak,  
alkarri meserik  
zor diozkagunak  
txakurkume batentzat  
bertso auek danak,  
ala ere billatziak  
emango 'izkit lanak.

13.º Naiz ez egonagarren  
len zan bezin gizen  
bata bestiarekin  
konpondu gaitzen,  
bide galtzerik gabe  
etortzeko zuzen,  
beriala esango det  
nun bizitzen naizen.

14.º Alde aundiya dago  
txarretik prestura,  
itz eiyogun alkarri  
gizonen postura,  
agindutako dana  
artzeko eskura,  
etorri Tolosa'ko  
Txoko ostatura.

